

Izaki Abestia

«Inviolabilia enim Ipsius, a creatura mundi, per ea
quae facta sunt, intellecta, conspiciuntur».

Rom. 1-20.

Ona, arrats gorri, udazken eriotz,
Sutan dijoakit, —ala nere biotz—
Sutan dirdirakor laño erraietan,
Argi-urre naspil nere begietan...
Izaki maitea, Jainko naiak nakar.
Otoitz egarri au zuk berdindu bear!
Otoitz xurru-murru, barne zimikoa
Ausnartu nairikan mendira nijoa.
Ler zorian nago egi-min maite-min...
Utsaren leloa: besarka nai t'ezin!

... ..

Zelaiburun eder zozoak txiruli
Bere azken agur Jainkoari dagi.
Baserri ke urdiñ, mendi itzal luze
Illunabar mami: argi, oler, aize.
Dena zoragarri... Zantzuren bat datza:
Susmo biziz dakust Jaunaren'kerantza.
Oro biur nadin izaki maitale
Gerosle leiatsu, Asis'ko eskale!
Zantzu oien gose nere zentzu legor
Izate eder muñak aztar naiez dator.
Muñ au izakian ereñirik dago
Zantzu bat dagernez ainbat sakonago.
Sakon kabitxoan maite zantzu kutun,
Sakon iturri garbian apaltasun.

Pagoak dager liraintasun ezea,
 Gauak ezereza illundiz betea.
 Gauz denak dagite Jabearen berri
 Loreak, aizeak, oiur zoragarri.
 Eder ezak Jauna, izar dirdir goiztar,
 Iturritxoaren mintzo zerutiar...
 Izaki maitea: mintza atergabe,
 Goretsi Jainkoa zeru-lurren Jabe.
 Jainkoa'gan murgil, eder zorabio
 Nere barneari atsedean dagio...

... ..
 Illuntzen eguna, dena itzal aldi.
 Bañan biotza nik maitez begiz gaïndi.
 Ametsen bat ote izaki margoa?
 Margoa baleike; ez nere leloa.
 Maite-miñ egi-miñ egunak igesi,
 Gauak —itsu nabil— eder miña azi...
 Utsa naizela ta, ontan bear etsi:
 Izaki abestiz Jainkoa goretsi!

